

Skýrsla formanns

Aðalfundur FFÍ árið 2015 var haldinn 27. febrúar og var vel sóttur. Félagsmenn gerðu ekki athugasemdir við reikninga en eftir skýrslu formanns var bent á að gott væri að tilgreina í henni fjölda funda á vegum félagsins. Voru bæði reikningarnir og skýrslan samþykkt. Allar sitjandi stjórnarkonur gáfu kost á sér til stjórnarstarfa og voru þær kjörnar einróma: Hulda Sif Birgisdóttir, Jóhanna Björk Guðjónsdóttir, Sigurbjörg Eðvarðsdóttir og Sigurbjörg Gylfadóttir.

Frönskukeppni framhaldsskólanema var haldin í lok viku franskra tungu, laugardaginn 21. mars á Reykjavíkutorgi í Borgabókasafninu við Tryggvagötu. Keppendur voru 9 talsins og unnu þeir myndbönd út frá efninu „La France de la diversité“. Í dómnefnd voru Auður Ava Ólafsdóttir rithöfundur, Guðlaug Matthildur Jakobsdóttir, fyrrum formaður Alliance française og Philippe O'Quin, sendiherra Frakklands á Íslandi. Sigurvegari keppinnar var nemandi úr Kvennaskólanum, Sindri Máni Ívarsson. Hlaut hann í verðlaun ferð til Frakklands og tíu daga námskeið í tengslum við alþjóðlegu kvikmyndahátíðina í La Rochelle. Fóru hann og Gríma Eir, sigurvegari frá árinu 2013, til La Rochelle í júlí síðastliðnum og voru mjög ánægð með dvölinu.

Í byrjun páskaleyfis, 26.-29. mars, sóttu formaður, Jóhanna Björk, og gjaldkeri, Sigurbjörg Gylfadóttir, seminar í Helsinki í Finnlandi. Var það félag frönskukennara í Finnlandi, APFF, sem hafði veg og vanda af skipulagningu seminarsins og fékk styrk frá NordPlus til að fjármagna hann að hluta. Formaður sótti um styrk til stjórnar KÍ til að standa straum af ferða- og gistikostnaði og fékk félagið úthlutað 140 þúsund krónum til þess.

Sumarnámskeið FFÍ fór fram í húsnæði EHÍ í Reykjavík dagana 4. og 5. júní. Var fenginn leiðbeinandi frá Cavilam í Vichy, Emmanuel Zimmert, til að fjalla um frönskukennslu með spjaldtölvum. Var námskeiðið bæði gagnlegt og gott og sóttu það alls 15 félagsmenn.

Um miðjan júní var nemendum sem höfðu sýnt framúrskarandi árangur í frönsku á stúdentsprófi boðið til hófs og viðkenningaafhengingu í sendiherrabústaðnum. Var góð mæting og almenn ánægja með viðburðinn.

Formaður hélt til Kaupmannahafnar í lok október til að taka þátt í fundi CEO (Commission de l'Europe de l'Ouest, þ.e. vestur-Evrópu hóps Fédération internationale des professeurs de français). Stóð fundurinn í tvo daga, 30. og 31. október og var þar rætt m.a. um "Livre blanc" sem áætlað er að komi út árið 2016, verkefni sem félög frönskukennara bera ábyrgð á, samkeppnir frönskukennara og nema, heimsping FIPF í Liège í júlí 2016 og stöðu frönskunnar almennt. Kynnti undirrituð nýja útfærslu á verkefninu „Journal d'élèves“ á skólasamskiptamiðlinum Edmodo og féll hún vel í kramið hjá viðstöddum. Ekki hefur verið unnið meira í því verkefni á vettvangi CEO en undirrituð hefur notað Edmodo í kennslu, m.a. í samvinnu við Sigurbjörgu Gylfadóttur og Margréti Helgu Hjartardóttur. Verður væntanlega framhald á því starfi.

Stjórn félagsins ákvað að standa fyrir hönnun og prentun á dreifiblaði til að vekja athygli á frönskunni meðal grunnskólanema sem þurfa að velja sér þriðja mál um þessar mundir. Stjórnarkonur lögðu til innihald og Hildur Gylfadóttir, grafískur hönnuður, sá um að raða því á blaðið. Prentun fór fram hjá Guðjóni Ó. sem prentaði 1000 eintök sem tilbúin voru í lok febrúar. Fékk félagið vilyrði fyrir 25 þúsund króna styrki til verkefnisins frá sendiráði Frakklands.

Formaður sótti fund í desember í sendiherrabústaðnum þar sem kom saman hópur fólks sem lætur sig framtíð frönskunnar á Íslandi varða. Var það konsúll Frakklands, Gaëlle Hourriez-Bolatre, sem boðaði til fundarins og stýrði honum. Árangur fundarins er m.a. myndband sem verður unnið í samstarfi við nemendur úr Kvikmyndaskóla Íslands en með því á að vekja athygli á frönskunni. Næsti fundur hópsins er ráðgerður í apríl næstkomandi.

Formaður sótti auk þess ýmsa viðburði í tengslum við formennskuna, m.a. móttökur á vegum sendiherra, vínsmökkun, athöfn til heiðurs Elínar Pálmadóttur (þar sem hún hlaut stórriddarakross franska ríkisins) og tónleika.

Félagið skipulagði þrjá félagsfundi á stjórnarárinu (auk aðalfundar), einn vinnufund og stjórnarfundir voru haldnir að meðaltali einu sinni í mánuði.

Reykjavík, 1. apríl 2016

Jóhanna Björk Guðjónsdóttir, formaður FFÍ